

03 December. 2025

समे .18:15 Hrs

<><><><><><>

Headlines

- उपराज्यपाल मनोज सिन्हा होरें दिव्यांगजनें दे हक, सम्मान ते समावेशन आस्तै सांझे जतनें दी जरूरता पर जोर पाया।
- मुख्मन्त्री उमर अब्दुल्ला हुंदी अध्यक्षता च होई दी काबिना दी बैठक च शिडक ते भवन निर्माण मैहकमे च तरक्की देने, ध्याड़ीदारे बरै रिपोर्ट ते जानवरें दी हिफाजत सरबन्धी बोर्ड कायम करने गी मंजूरी दिती।
- मुख्मन्त्री उमर अब्दुल्ला होरें एस.आर.ओ-43 तैहत नियुक्ति पत्तर दित्ते। हमदर्दी दे आधार पर होने आहली नियुक्तिएं गी होर सखल्ला बनाने, उन्दे च पारदर्शिता आहने दा भरोसा दोआया।
- केंद्र नै लोसभा च जानकारी दिती ऐ जे जम्मू-कश्मीर च स्किल इंडिया मिशन तैहत 4 लख 29 जहार युवाएं गी सिखलाई दिती गई।
- जम्मू-कश्मीर च पारा हेठ औने करी तापमान च गिरावट।

<><><><><><>

LG-Divyangjan

उपराज्यपाल मनोज सिन्हा होरें अधिकारियें, सामाजिक संगठनें ते हितधारकें कन्नै दिव्यांगजनें दे अधिकारें दी रक्षा ते बढ़ावा देने लेई अपनी प्रतिबद्धता दोहराने दा आग्रह कीता। उनें समाज च उंदी गरिमा ते पूर्ण भागीदारी यकीनी करने लेई संवेदनशीलता, जागरूकता ते इकजुट संकल्प दी जरूरतै पर बल दित्ता। अंतरराष्ट्री दिव्यांगजन दिवस दे मौके पर आयोजित इक कार्यक्रम च बोलदे होई उपराज्यपाल होरें आखेआ जे हर इक व्यक्ति ते संस्था गी दिव्यांगजनें लेई शिक्षा, कौशल विकास ते स्थाई आजीविका दे मौके तोड़ी पुज्ज यकीनी करने दी दिशा च कम्म करना लोडचदा। उपराज्यपाल होरें दिव्यांगजनें दे दृढ संकल्प, लीचलेपन, अपार क्षमता दी सराहना कीती। उनें आखेआ

<><><><><><>

Persons With Disabilities

अंतरराष्ट्री दिव्यांगजन दिवस दे मौके पर समाज कल्याण विभाग आसेआ इक प्रमुख जागरूकता ते कल्याण कार्यक्रम दा आयोजन कीता गेआ। इस पैहल तैहत रियासी दी उपायुक्त निधि मलिक होरें निर्भया स्वास्थ्य योजना तैहत पात्र दिव्यांगजनें गी स्वास्थ्य ई-कार्ड वितरित कीते जिस कन्नै चिकित्सा दिक्खभाल ते आपातकालीन सेवाएं तोड़ी उंदी पुज्ज असान होई गई। इस मौके पर बोलदे होई उपायुक्त मलिक होरें दिव्यांगजनें लेई इक समावेशी ते सहायक वातावरण गी बढ़ावा देने लेई प्रशासन दी प्रतिबद्धता दोहराई। आकाशवाणी समाचार कन्नै गल्लबात करदे होई जिला समाज कल्याण अधिकारी सचिन शर्मा होरें आखेआ

Cabinet-Meet

मुख्यमंत्री उमर अब्दुल्ला हुन्दी अध्यक्षता च अज्ज मंत्रिमंडल दी बैठक होई। इस दौरान केई सारे प्रशासनिक, विकास ते लोक हित कने जुड़े दे मामलें पर चर्चा कीती गई। इस दौरान शिड़क ते भवन निर्माण मैहकमें च पदोन्नति, कर्मिणं दी वरिष्ठता दी तस्दीक तेजानवरें दी राखी हिफाजत सरबन्धी बोर्ड दी स्थापना सनें केई विभागीय प्रस्तावें गी मंजूरी दिती गई। आकाशवाणी जम्मू संवाददाता दी रिपोर्ट मूजब बैठक च शासन ते विकास कने जुड़े दे केई प्रशासनिक मुद्दें पर बी चर्चा होई। बैठक च बक्ख बक्ख मैहकमें दे ध्याडीदारें दे मुद्दे पर बी विचार विमर्श होआ। मुख्य सचिव होरें गी तौले थवा तौले सरबन्धी रिपोर्ट पेश करने लेई आक्खेआ गेआ ऐ। मगरा बैठक दे मुख्य बिन्दुएं बारे जानकारी दिन्दे होई मुख्य मंत्री उमर अब्दुल्ला होरें आक्खेआ

<><><><><><>

CM SRO

मुख्यमंत्री उमर अब्दुल्ला होरें अज्ज एसआरओ 43 ते पुनर्वास सहायता योजना R.A.S. 2022 तैहत कम्पैशनेट नियुक्तियें दे लंबित मामलें गी निपटाने लेई अपनी सरकार दी प्रतिबद्धता दोहराई ते आश्वासन दित्ता जे पूरी प्रक्रिया गी सखल्ला ते पारदर्शी बनाने लेई जित्थे बी जरूरी होग, सब्बै जरूरी छूट दिती जाहग। मुख्यमंत्री होर इत्थे कन्वेंशन सेंटर च आयोजित इक समारोह च बोला'रदे हे जित्थे उनें एसआरओ 43 ते R.A.S. 2022 तैहत मेदवारें गी नियुक्ति आदेश सौंपे, कने गै स्कूल शिक्षा विभाग दे (CPW) दे नियमित करने दे आदेश बी जारी की। मुख्यमंत्री होरें आक्खेआ

<><><><><><>

Accident

राजौरी जिले आली जरनैली सिड़कै पर अज्ज बडुलै छिंगुस आले हिस्सें पर होए दे सिड़क हादसे च 2 लोकें दी मौत होई गई ते 3 जनें जख्मीं होई गे। अधिकारियें मुजब- एह हादसा अज्ज बडुलै सवेला उसले पेश आया- जिसले इनें लोकें गी लेइयै जा रदी गड्डी सिड़कै थमां रुलकियै पुट्टी होई गई। हादसा इन्ना जबरदस्त हा जे 2 जनें दी मौके पर गै मौत होई गई- जिसले के 3 जनें जख्मी होई गे। जख्मियें गी तौले गै नेड़े दे इक अस्पताल च लैता गया- जित्थे उंदा इलाज चला करदा ऐ। पुलसै इस हादसे दे सरबन्धै च जांच शुरु करी दिती दी ऐ।

<><><><><><>

JK Skill India

केंद्र नै आक्खेआ ऐ जे स्किल इंडिया मिशन दे इक हिस्से दे तौर पर प्रधानमंत्री कौशल विकास योजना जम्मू-कश्मीर च 4 लक्ख 29 ज्हार 954 युवाएं गी सिखलाई दिती गई ऐ जिसलै कि केई होर दुई केंद्र प्रायोजित स्कीमां युवाएं दे हुनर गी होर बेहतर करने लेई चलाइयां जा'रदियां ना। आकाशवाणी जम्मू संवाददाता दी रिपोर्ट मुजब लोकसभा च हुनर विकास ते उद्यमिता मंत्रालय नै इक लिखित परते च दस्सेआ जे जम्मू-कश्मीर च N.A.P.S तैहत 4 ज्हार 454 युवाएं J.S.S तैहत 12 ज्हार 996 मेदवारें गी सिखलाई दिती गई ते C.T.S तैहत 57 ज्हार 630 दा पंजीकरण कीता गेआ ऐ।

Kishtwar Labour Codes

किश्तवाड़ च सहायक श्रम आयुक्त ममता सुदर्शन होरें आखेआ ऐ जे मजदूर वर्ग आर्थिक विकास ते बाढ़े दा मुख आधार हुंदा ऐ, उ'नेंगी उन्दे बाढ़े विकास ते मदद लेई केई सारे लाहू हासिल होडन। एहू गल्ल उनें आकाशवाणी दे जिला संवाददाता कैलाश नाथ हुंदे कन्नै कीती गेदी खास गल्लबात दरान आक्खी। उनें जोर देइयै आखेआ जे नमी श्रम संहिता दा मकसद कम्म करने दे पूरे-पराते सरिस्ते च सुधार आहनन ते श्रमिकें दी समाजी सुरक्षा गी यकीनी बनाना ऐ। उनें आखेआ

<><><><><><>

DCO-Ramban

कोरियर सेवाएं दा नशीले पदार्थें दी तस्करी लेई गलत इस्तेमाल नेई होऐ ते नशीले पदार्थें पर रोक लाने सरबन्धी अभियान तैहत मुकामी प्रशासन रामबन नै कोरियर सेवां उपलब्ध करोआने आहलें लेई किश जरूरी ते लोडचदे तरीकाकार अमल च आंदे न। रामबन जिले च कोरियर सेवा आहलें गी सख्ती नै हिदायत दिती गेई ऐ जे ओहू दोआइए आहली कुसै बी कंसाइनमेंट्स गी विजन ड्रग कंट्रोल आफिस गी जानकारी दित्ते बगैर अगगे नेई भेजन। जिला प्रशासन नै आखेआ ऐ जे एहू सारें दी जिम्मेदारी ऐ जे नशीले पदार्थें आहली माड़ी कवैतू पर रोक लाई जा। उनें सरबन्धी सेवा उपलब्ध करोआने आहलें गी आखेआ ऐ जे ओहू पूरा-पूरा सहयोग करन तां जे माड़ी कवैतू गी जड़ थमां खत्म कीता जाई सकै। होर जानकारी दिंदे होई रामबन दे असिस्टेंट कंट्रोलर ड्रग संजीव कुमार गुप्ता होरें आखेआ

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू कल 4 दिसम्बर गी “वन्य जीवन संरक्षण” सरबन्धी ध्याड़े दे मौके पर 25एं मिन्टें दी इक विशेष चर्चा प्रसारित करने जा'रदा ऐ जेहदा विशे ऐ “जागरूकता ते शिक्षा राएं वन्य जीवन संरक्षण”। एहू कार्यक्रम वीरवारें दपैहरी 12 बजे प्रसारित कीता जाहगा। इस विशेष प्रसारण च साढ़े परौहने होडन Chief Wild Life Warden ते Principal Chief Conservator of Forest. Sarvesh Rai जेहड़े इस विशे पर अपने माहिराना विचार साहड़ें श्रोताएं कन्नै सांझे करडन। कार्यक्रम दी मेजबानी साढ़ियां एंकर श्रुति खजूरिया होर करडन। एहू कार्यक्रम मीडियम वेव 303 मीटर यानि 990 किलोहर्टज ते एफ.एम 100 अशारिया 3 मैगाहर्टज पर प्रसारत कीता जाहगा।

<><><><><><>

NCC Cadets -BOP Visit

इक महत्वपूर्ण ते यागदार अनुभव लेई 245 NCC कैडटें दे समूह गी ऐतिहासक सुचेतगढ़ बन्ने दे शैक्षणिक दौरे पर लैता गया। इस दौरे दा आयोजन 9 J&K Girls बटालियन NCC ग्रुप- श्रीनगर हैडक्वाटर दे तैहत जारी सांझे सालाना सिखलाई कैम्प दे इक हिस्से दे तौर पर कीता गया ऐ। बटालियन ते कमांडिंग अफसर कर्नल शरद शर्मा हुंदी अगुआई च NCC कैडटें दे इस समूह गी सुचेतगढ़ आले इस बन्ने दे दौरे पर लैता गया ऐ। इनें कैडटें चा मते

सारे श्रीनगर दे रौहने आहलें न ते उनें एदे शा पैहले कदे बी कोई सरहदी चौकी नेंई दिक्खी दी ही- जेदे चलदे ए दौरा उंदे आस्तै इक यादगार अनुभव बनी गया ऐ।

<><><><><><>

Weather

मौसम विभाग दे अधिकारियें दस्सेआ ऐ जे जम्मू-कश्मीर च कड़ाके दी ठंड जारी ऐ ते ज्यादातर इलाकें च घट्टोघट्ट तापमान फ्रीजिंग प्वाइंट कोला हेठ पुज्जी गेआ ऐ। जम्मू क्षेत्र च तापमान च उल्लेखनीय गिरावट आई ऐ, जम्मू शैहर च 8.1 डिग्री सेल्यिस, बनिहल च मनफी 0.7, भद्रवाह च मनफी 0.2, राजौरी च 1.4, साम्बा च 2.5, डिग्री सेल्यिस दर्ज कीता गेआ। कटड़ा च 7.6, उधमपुर ते रामबन च 4.0 ते 4.1 डिग्री सेल्यिस दर्ज कीता गेआ। श्रीनगर च घट्टोघट्ट तापमान मनफी 4.4, पाम्पोर च 5.0, अनंतनाग च 5.3, बारामुला च 5.3, पुलवामा च 5.5 डिग्री सेल्यिस दर्ज कीता गेआ ते शोपियां च मनफी 5.9 डिग्री सेल्यिस दर्ज कीता गेआ। अधिकारियें राती दे तापमान च लगातार गिरावट दा कारण खुशक मौसम दस्सेआ।

<><><><><><>